



KEMENTERIAN KEMAJUAN  
LUAR BANDAR DAN WILAYAH

## **TEKS UCAPAN**

**YB DATO' SRI ISMAIL SABRI BIN YAAKOB**  
**MENTERI KEMAJUAN LUAR BANDAR DAN WILAYAH**

## **SEMPENA**

**MAJLIS KONVOKESYEN**  
**KOLEJ UNIVERSITI AGROSAINS MALAYSIA (UCAM) KE 16**

**DEWAN BESAR UPM, SERDANG**

**5 OKTOBER 2017 (KHAMIS)**  
**WAKTU KETIBAAN : 9.30 PAGI**

السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

Terima kasih Tuan / Puan Pengacara Majlis.

## **SALUTASI**

YB Datuk Alexander Nanta Linggi  
Timbalan Menteri I KKLW

YB Datuk Ahmad Jazlan bin Yaakub  
Timbalan Menteri II KKLW

YBhg. Datuk Borhan bin Dollah  
Ketua Setiausaha KKLW

YB Datuk Zahidi bin Zainul Abidin  
Pengerusi RISDA

YB. Dato' Hj. Mohd Fasih b. Hj. Mohd Fakeh  
Pengerusi UCAM

YBhg. Dato' Wan Ahmad Shabri Zainuddin bin Wan Mohamad  
Ketua Pengarah RISDA

YBrs. Prof. Datuk Dr. Faridah Hanam bt Mohd Rashid  
Naib Canselor UCAM

Ahli ahli Lembaga Pengarah UCAM.

Ahli-ahli akademik dari UPM, UiTM/CEO IPTS  
Pegawai pegawai Kanan RISDA / UCAM

Rakan – rakan Media

Ibu Bapa, Para Graduan, Tuan – Tuan dan Puan – Puan yang dikasihi sekalian

Assalamualaikum W.B.T., Salam Sejahtera, Salam Kasih Sayang dan Salam Sehati Sejiwa,

1. Alhamdulillah, bersyukur kita ke hadrat Ilahi kerana dengan limpah kurnia-Nya, kita semua dapat berkumpul di dewan ini bagi meraikan Majlis Konvokesyen Kolej Universiti Agrosains Malaysia (UCAM) ke-16 tahun 2017. Di sini, saya ingin mengucapkan sekalung tahniah kepada warga kerja UCAM serta semua pihak yang telah bertungkus-lumus dan memberikan sepenuh komitmen agar majlis yang penuh bermakna ini dapat direalisasikan bagi meraikan kejayaan para graduan.

2. Tahniah kepada para graduan kerana berkat daya usaha, kegigihan dan kesabaran dalam mengharungi alam pengajian, segala usaha dan pengorbanan saudara-saudari sepanjang menjadi pelajar UCAM akhirnya telah berjaya membuahkan hasil. Pada hari yang bersejarah ini, saudara dan saudari diberi penghormatan untuk menaiki pentas ini bagi menerima sijil dan diploma masing-masing. Walau bagaimanapun, perjalanan untuk menimba ilmu tiada noktahnya kerana proses pembelajaran adalah satu proses yang berterusan di mana saudara saudari haruslah berfikiran terbuka dalam mempelajari sesuatu. Dengan adanya ilmu kita mampu melihat dan menilai sesuatu keadaan dari pelbagai perspektif. Ilmu itulah yang akan menjadi bekalan hidup bagi para graduan untuk membina kecemerlangan kerjaya dan menabur bakti kepada agama, keluarga, bangsa dan negara.

3. Saya ingin mengambil kesempatan ini untuk mengucapkan setinggi tahniah kepada para ibu bapa dan keluarga yang telah memberi sepenuh dorongan kepada semua graduan dalam memastikan kejayaan mereka pada hari ini. Semestinya perasaan gembira jelas terpapar di muka para ibu bapa dan graduan dalam menyambut hari yang amat bersejarah ini. Jasa bakti yang tiada tolok bandingnya telah dicurahkan oleh para ibu bapa amatlah besar dan majlis konvokesyen ini semestinya adalah hari yang telah dinanti-nantikan oleh para ibu bapa untuk meraikan kejayaan anak masing-masing.

#### **Para Graduan sekalian,**

4. Ilmu dan budaya ilmu adalah suatu proses yang dinamik yang berterusan dan ia merupakan satu komponen yang penting dalam proses pembangunan sahsiah diri, organisasi dan negara. Justeru, pendidikan dan penghayatan ilmu perlu sentiasa ditingkatkan dan dikukuhkan walaupun pengajian secara formal para graduan telah tamat di UCAM. Konvokesyen ini merupakan suatu titik permulaan bagi saudara dan saudari mengorak langkah ke tahap yang lebih tinggi dan memahami erti dan cara kehidupan berkerjaya. Bagi meningkatkan produktiviti dan kualiti kehidupan negara, tenaga kerja yang berdaya kreatif, berinovasi dan berintegriti amatlah diperlukan. Oleh yang demikian adalah diharapkan agar saudara dan saudari para graduan dapat terus mengambil peluang bagi meningkatkan lagi kemahiran dan pengetahuan dalam bidang-bidang berkaitan pada masa-masa akan datang.

**Y.Bhg. Tan Sri, Dato'-Dato', Datin-Datin, Tuan-Puan dan Hadirin Sekalian,**

5. Harapan saya terhadap para graduan adalah supaya saudara dan saudari tidak hanya memfokuskan pencarian peluang kerja di bandar-bandar besar semata-mata. Saya amat berbesar hati dan menghargainya jika para graduan sudi berkhidmat kepada masyarakat di luar bandar. Seiring dengan dasar Transformasi Nasional 2050 atau TN50 yang diperkenalkan oleh YAB Dato' Seri Mohd Najib bin Tun Abd. Razak, Perdana Menteri Malaysia, beliau telah menegaskan betapa pentingnya pendapat dan idea-idea baru dari generasi muda dalam peningkatan kualiti negara dalam tempoh 30 tahun akan datang. Beliau jelas menekankan bahawa idea-idea baru anak muda inilah yang bakal menjadi tonggak bagi meningkatkan kualiti kehidupan masyarakat kelak. Saya yakin dan percaya bahawa graduan sekalian telah diterapkan dengan ilmu pengetahuan, kemahiran kepimpinan, komunikasi dan pengurusan yang diperlukan bagi membangunkan modal insan masyarakat luar bandar.

6. Seperti yang kita semua sedia maklum juga, UCAM menawarkan kursus Diploma Pembangunan Luar Bandar (DPLB) yang mana kursus ini adalah satu-satunya yang ditawarkan di Malaysia. Program ini bakal menjadi platform dalam melahirkan bakal-bakal pemimpin yang akan membawa arus pembangunan luar bandar di Malaysia. Saya difahamkan bahawa pelajar-pelajar kursus DPLB di UCAM ini amat aktif menjalankan program-program bersama penduduk-penduduk luar bandar bagi sama-sama mencari isu dan solusi serta penambahbaikan taraf hidup penduduk luar bandar. Justeru, saya menyeru lebih ramai lagi lepasan-lepasan SPM di luar sana merebut peluang menyambung pengajian di UCAM bagi kursus Diploma Pembangunan Luar Bandar ini agar Malaysia tidak akan ketandusan pakar di dalam proses membandarkan luar bandar.

7. Susulan berkaitan dengan program Diploma Pembangunan Luar Bandar, mulai tahun hadapan, saya menggalakkan agar semua Pengerusi Jawatankuasa Kemajuan dan Keselamatan Kampung (JKKK) seramai 16,000 orang di seluruh negara berpeluang untuk meningkatkan tahap profesionalisme mereka sebagai pemimpin akar umbi dengan mengikuti kursus peringkat diploma di UCAM. Saya yakin UCAM pasti telah bersedia dengan modul yang bersesuaian kepada JKKK ini.

8. Selain itu, saya juga melihat potensi UCAM begitu menyerlah dalam membantu membangunkan Malaysia sebagai Hub Halal dunia. Penubuhan hub halal adalah usaha bersepadu daripada pelbagai sektor industri meliputi farmaseutikal, makanan, kosmetik, pembungkusan, logistik dan perkhidmatan. Malah, ia telah menjadi visi dan misi kerajaan bagi merealisasikan Malaysia sebagai hub halal global menjelang 2020. Pasaran halal global yang dianggarkan melebihi AS\$2.3 trillion setahun menyediakan pelbagai peluang untuk diterokai dan dimanfaatkan bagi meningkatkan pertumbuhan ekonomi Negara kita. Oleh yang demikian, kewujudan Halal Innovation Centre ataupun HALIC di UCAM dengan kerjasama

Jabatan Kemajuan Islam Malaysia (JAKIM) dilihat sebagai satu langkah proaktif dalam menyediakan kursus-kursus HALAL bagi melahirkan eksekutif halal untuk agensi atau pemilik syarikat perseorangan bagi mendapatkan status HALAL kepada produk-produk yang dipasarkan. Ini sejajar dengan pengiktirafan UCAM sebagai *Certified Training Provider* oleh JAKIM pada bulan Mei yang lalu untuk melaksanakan program latihan di dalam industri HALAL. Diharapkan para graduan yang berada di sini pada hari ini terutamanya yang mengambil jurusan keusahawanan akan sentiasa peka dengan perkembangan industri HALAL di Malaysia dan sama-sama menyumbang ke arah memperkasakan industri HALAL ini.

**Y.Bhg. Tan Sri, Dato'-Dato', Datin-Datin, Tuan-Puan dan Hadirin Sekalian,**

9. Kita boleh lihat kini, seluruh dunia berada di ambang Revolusi Industri 4.0. Revolusi ini adalah industri inovasi dan penyesuaian masyarakat terhadap teknologi baharu kerana kehidupan kita hari ini dan akan datang bakal dipacu oleh teknologi robotic dan *artificial intelligence* (AI). Oleh yang demikian, semua institusi pengajian tinggi (IPT) di negara ini termasuklah UCAM haruslah sama-sama mengambil peluang untuk menambahbaik serta memberi nilai tambah di dalam setiap kursus yang ditawarkan kepada pelajar bagi memenuhi kehendak pasaran yang dijangka bermula pada tahun 2021 ini. Pengukuhan program akademik Sains, Teknologi, Kejuruteraan & Matematik (STEM) dan juga pemerksaan Sistem Pendidikan Teknikal & Latihan (TVET) adalah langkah yang dilihat amat wajar kerana kedua-dua bidang ini akan membantu negara dalam membentuk modal insan kearah pembentukan teknologi baru agar para graduan mampu menangani cabaran Revolusi Industri 4.0 pada masa akan datang.

**Y.Bhg. Tan Sri, Dato'-Dato', Datin-Datin, Tuan-Puan dan Hadirin Sekalian,**

10. UCAM ialah sebuah institut pengajian terulung dan satu – satunya IPTS yang menekankan pendidikan pertanian. Saya amat berharap UCAM akan terus kukuh, dinamik dan maju dalam mewujudkan pelbagai peluang melanjutkan pelajaran kepada seluruh masyarakat terutama anak – anak pekebun kecil dan komuniti belia luar bandar. Saya yakin kolej universiti ini akan terus konsisten dalam usahanya menyediakan program pengajian yang menjamin kebolehpasaran graduan yang tinggi serta memastikan persekitaran pembelajaran yang kondusif bagi mencapai taraf sebuah universiti penuh menjelang tahun 2020. Tahniah saya ucapkan kepada UCAM dan syabas kepada RISDA yang berterusan memberi sokongan padu bagi memastikan UCAM terus relevan di persada keilmuan negara.

11. Saya juga ingin mengambil kesempatan ini bagi mengucapkan tahniah kepada tenaga kerja UCAM terutama para pensyarah yang telah melaksanakan tanggungjawab dengan sebaik mungkin. Kesungguhan dan kegigihan anda semua telah dapat mendidik generasi muda yang mampu menyumbang kearah tahap produktiviti dan daya saing negara. Harapan saya adalah supaya semua tenaga

kerja UCAM iaitu pihak pengurusan dan akademik dapat melipat gandakan usaha bagi membolehkan UCAM terus maju dan berjaya mencipta nama dipersada pendidikan tinggi negara terutama sekali sebagai IPTS yang terbaik di Malaysia.

**Para Graduan Sekalian,**

12. Saya ingin mengucapkan tahniah sekali lagi atas kejayaan saudara dan saudari dalam menamatkan pengajian anda di UCAM. Segulung sijil kini berada di dalam genggamannya anda semua. Sentiasa tekadkan diri anda untuk menjadi individu yang terbaik. Gunakanlah setiap ruang dan peluang yang ada untuk mempelajari sebanyak mungkin ilmu pengetahuan. Kemudian, aplikasikanlah segala ilmu yang telah anda pelajari untuk diri, keluarga dan masyarakat. Gunakanlah ilmu yang dimiliki sebaik-baiknya untuk kerjaya dan kehidupan yang cemerlang.

Akhir kalam, saya mengucapkan selamat maju jaya dan tahniah kepada UCAM, warga kerjanya dan para graduan sekalian.

Sekian, wabillahitaufik walhidayah assalamualaikum warahmatullahi wabarakatuh.  
Terima kasih.